

四庫全書

集部

欽定四庫全書

柝欄集卷八

宋 鄧肅 撰

古風

送李丞相四路宣撫

冷風吹海煙霧開繡衣使者天上来手持天書傳天語
促起天下豪傑魁下堂拜命汗如雨上堂鳴鼓旌旄舉
要令南國生清風不辭馬上蒸溽暑平生直氣高蒼穹
四海草木聞威風業以自任如伊尹那使流言動周公

君臣今日機鋒契六十九州歸重寄屠龍事業警狗偷
談笑定縛吳元濟功成上天相都俞指呼瓦礫化華胥
日闢農桑三萬里二十四考書中書我今流落窮吞紙
蟾蜍爬沙鞭不起歸歟自築茅三間為作野史書雄偉

大水雜言

前日雨如絲繽紛雜朝霧昨日雨如注萬壑爭馳騖今
朝有霽色作意在芒屨那知復如傾漫天飛瀑布介休
借車振蒼穹十八葉幡如火紅濤頭起復萬銀屋河伯

盡以山為宮門前小艇疾飛鴻挽我同趨急流中人生
如夢貴適意乘此可食千頭龍醉中舉杯謝舟子口腹
自營吁可鄙不聞大禹不過門血指為疏九年水何如
乘風闕
天坐令赤子脫魚腹六合
內外連桑田柳枝却下蛟龍約談笑支祁付鐵索異時
天上敢驚呼斥作人間鐺折脚

次韵王信州

煤炁飛上天沉沉三日霧銀河一壑摧狂雨恣橫驚我

恐鐵騎來疾馳不納屨氣豪如項羽勢猛似黥布瀰漫
江河接高穹石牛未洗血泥紅天吳八首真奇怪咄嗟
平地作銀宮我貧家火不星竈赤脚滅沒泥塗中目斷
曉風生少女又復茅簷飛白龍慙愧北來王夫子籍籍
聲名滿都鄙朝吟千賦暮千詩松腴亦須枯海水莫倚
文章似孟堅未用風流追樂天且以光芒破陰晦挽回
日色到桑田樂歲天公有嚴約斤落旄頭沉貫索從公
日醉三百杯不怕西風動旗脚

再次韵

我聞張微子仰天能復霧又聞填海神揮鞭石欲驚二
子呼不來登山自糾屨雷鼓速雲陣忽忽千岩布誰云
九萬隔高穹玉女笑眼逼人紅銀浦遂傾瓜蔓水雪浪
欲浮天梁宮孤孫得糟時哺翁汎汎浮家烟浪中競呼
力士來西域臨江吹縮十丈龍那知夏雨逢甲子身如
豬鴨不須鄙赤松作此豈無謀門生主兵渠主水長江
正欲截時晝夜亡智伯水如天此功朝成暮可齊便當

明月垂青田一雨從今十日約要賡豐年八弦索憑君
喚取阿戎俱笑上天門同軟脚

鼓腹謠

當時大鑊四十石餒鹿如柱餅八尺飽食起來舞金剛
揮戈天上駐斜日底事年來到骨窮災蒲脯苔誑腹空
關牛一飯期五日一半又聽閣黎鐘啄腐吞腥將日削
天公作意殊不惡十圍漸化楊柳輕因馭冷風上寥廓

次鼓腹謠元韻

我心不轉本非石世路如沙任退尺杯酒高懷獨未忘
只有三萬六千日原憲雖貧亦非窮石髮溪毛放筋空
已遺寸毫飽風月安得高堂列鼎鐘明朝莫怕山如削
夾路花香破酒惡世間得失競雞蟲一笑危岑天地廓

戲王子和

豪華相陵豆粥石坐上珊瑚碎三尺那知蕭條洙泗間
竈火不星連七日我生不復餞文窮醉眼從來四海空
一飽便令百憂失三合紅陳等萬鐘君家况有柳枝弱

金史卷八
卷八
客惡不容主人惡造門果腹姑置之杜陵寒眼憑君廓
鼓腹謠謝許令

東坡不戀二千石却羨黃州芋經尺一飽何妨作許難
千古光芒買白日我生不暇哭途窮入戶青錢轉手空
肉食不容久青瑣齒牢但可叩天鐘許侯詩成謝斷削
飛流來洗徐凝惡開緘百里已生春九州更賴此心廓
風雨損荔子

前日雨聲如隕石昨日風狂退六鷁荔子吐華漫如雲

結實定知無十一南來無以慰愁煎端期一飽果中仙
山頭看花日千轉默想香味空流涎事類翻羹慎勿恤
風雨在天非人力要及豐年天下同那為海邦私一物

題吹衣亭

馬上衣衫浣塵土斂板權門腰偃僂冷風天上呼不來
厚顏如甲汗如雨星郎高韵凌雲烟天賴喚歸酌流泉
人間熱惱熏不到亭上鶴衣飄欲仙君方醉樂人愁絕
何如御此登天闕叩天借此衣上風吹下九州作春色

遊鼓山

蘭橈艤岸雷霆駭

闕

海吾人作意水石間

素志豈因風雨

闕

衡山不知為開雲

魯陽莫試揮戈手郭寨何妨整角巾
山僧道我飛芒屨要看渠師得道處
雪噴鼎烹一斤迴千古澗流不東注
我笑老師太豪雄故令鬼物窺吾踪
安得廓然無聖解蒼厓依舊飛白龍

別珠公

我頃詩成准勅惡寒江夜度秋蕭索曳杖從師得摩尼
洗空愁腸天地廓年來狂妄嬰逆鱗去國三秋又出奔
隔牆後得綈袍舊一笑喚回逆旅春我心不轉嗟匪石
方壯兩遭天上斥處處逢君道價高萬指方袍超法席
白雲天下妙林泉看君又作新法緣倘能容此無歸客
便當結社追白蓮

送許丈赴行在

天狗夜吠夷門月乾坤易位人泣血那知千官舞蹈迴

馬上洋洋面不熱許侯逆風敢孤騫黃金圍腰挽不前
吾君已立閨位退再拜丹墀吾節全我時上天恣狂直
權臣舌端飛霹靂當時陷穽皆交遊侯獨臨存真鐵石
此來邂逅一笑間夜傾闔酒赤如丹胸中磊塊澆未下
征旆怱怱又吳山山前鮫鱷翻平陸殺人如麻未充腹
憑君仗劍追祖風坐令四海桑田復

栢欄集卷八

欽定四庫全書

柝櫓集卷九

宋 鄧肅 撰

古詩

後迎駕行

揮鞭衝曉露歸鞍載夕陽一日復一日不見御袍黃偏
諸須文綉羶車奉珪璋作意禮樂盛而乃訪毛嬙上皇
襲太平珍怪來四方奇氣驚鬼劃舞腰欲雲翔端為大
盜積萬里來貪狼文移急星火搜抉到毫芒伐柯則不

遠吾道其復昌君看天宇間紫微已輝光躍馬今朝去
定拜玉爐香惡衣供禹御茅茨覆堯堂為邦消底物人
心歸則王

鄧成彥邀李益之朱喬年及某一飯適忌日無
侑觴者遂遲明日成彥偶在式假以食素謝
吾三人朱且行僕因以詩促之

點額萬里歸兀坐冷如水慙愧北阮賢為余欣設醴既
邀折檻朱仍約騎鯨李人乳已方丈清歌已皓齒那知

事大謬及誤占食指得鹿倘是夢翻美得無鬼我生飲
紅裙萬事空一洗所失如蝟毛豈惟一飯耳端恐荀陳
會自此參辰矣憑公反高陽勿專蘭亭美主人或素餐
蘇晉端可擬何妨具一烹肉食從客鄙

偶成

我涉江東路平地雪盈尺明日疊芙蓉晴天開曉日竭
自發源來陰雨連朝夕瘦馬過雲際又斷簷間滴顧我
亦何人市朝欲歸迹平生詩酒交落井仍下石那知涉

畏途乃煩造化力要知萬里行人謫非天謫衡雲霽韓
愈海市呈蘇軾君知此理不鬼物護狂直

古意

妾身如暮雲陰霾愁漸濃郎來如曉色日高雲自空曉
色未應夜愁雲不可重會持一杯酒舉室生春風

其二

妾心如寒梅隨郎遍江東郎身如飛雪知落何亭中雪
花故清絕何人能擊節梅花歲歲春千秋香不滅

其三

妾如傍籬菊不肯嫁春風
郎如出谷鶯飛鳴醉亂紅
亂紅有何好風雨一夕空
菊英雖枯淡不愁霜露濃

觀子陵畫像

陶朱防狡兔渭濱兆非熊
先生但釣月君王友不從我
昔訪其迹磳光磨青銅
呼公公不應天籟自號空
何人知此景携歸梵王宮
乃知夜半力端在寸毫中

謁南齋諸友

青青門外竹，練練澗中流。水佳自扣枕，天壤無炎洲。我
友有高韻，來爲扶策遊。塵埃飛不到，軒窓寸寸秋。高文
穿天心，細字編蠅頭。氣豪欲騎月，志銳定焚舟。我來初
過雨，衣衫宜翠浮。平生百斛塵，一洗空不留。歸來短檠
下，清風入夢幽。不知白蓮社，肯容靈運不。

再用南齋韻謝

沙溪清可啜，遠山翠欲流。翩然航一葦，浩歌入蘆洲。高
堂上木杪，幽人事勝遊。但足簞瓢樂，不知天地秋。我輩

嗟無口冥搜空掉頭何如三才傑等是濟川舟
開卷騰光怪天上卿雲浮阿雲又嗣音吾研不欲留平生浪詩
聲寒蟲號清幽已對狂道士從此敢吟不

登妙峰閣

維舟古木陰故人能倒屣相携步高閣千尺誇雄偉雨
餘天氣清宇宙空如洗對面碧玉峰去天不盈咫憑欄
一超然欲搏九萬里下視囂塵間蠢蠢欲蝨耳平生浪
自苦馬上肉消髀匆匆欲何之燒色更隱几入夜寂無

人波聲欄下起坐覺非塵寰雷霆生脚底

遊東山

草木得新露襲人吹冷香泉水夜相激衾枕自清涼我
携謫仙人眉目秀而長高樓洗塵累抵掌論老莊若人
不世有

闕

跨皓鶴同作雲間翔

雲際嶺

蒼蒼九萬里拍塞雨天葩雲際在天上我去更携家不
知山高低晶熒浩無涯迴頭見侍者濛濛隔瓊花

謝丹霞老師

丹霞脩何行天花雨紅英草莽化金碧宴坐十年成落
筆多奇語酌唱皆名卿微言寄禍福無心天籟鳴頃年
來七峰見我眼增明西來的的意一語貫三辰坐令塵
土人彈指悟無生別來今許久夜夢飛與靈新詩忽入
手春風死草萌公以慧生定我自明而誠相望雖千里
秋風共一清去去勿作念明鑑無將迎

玉山避寇

前年十月間甲兵滿大梁小臣阻天對血涕夜沾床去
年十月間左省謫征商扁舟歸無處江浙俱橈槍今年
十月間叛卒起南方官兵且二萬一旦忽已亡一身幸
無責奉親走窮荒天宇如許大八口無處藏空山四十
日畫餅誑飢腸竭來古招提和氣霽脩廊迎門有禪伯
梵行照穹蒼却念客無歸燒猪飯蘇郎方袍二百指祖
燈其復光中有護法人義氣干天槍倒床得甘寢不知
冬夜長明朝曹夫子破浪飛危檣入門郁春色滿船載

瓊漿高談鸞舞飛佳句刻琳瑯那知奔竄中一樂得未
嘗何當掃陰雪四海共春陽便攜我輩人浩歌歸醉鄉
世事如奕棋臧否均亡羊蓑衣可釣月底處是金章

次韵李舍人

道山文章伯杖履作幽棲筆硯為戲事業落翻墨螭平
生百萬言定相初不離更憐世間士塵網深相圍笑踵
雙林轍誓破萬夫疑八面列神王劍戟身携持怒目幹
龍宮機緘絕謀惟佛語浩無際天地如可彌笑談一轉

畢璿璣時未移見者皆了了鈍根化神機不然分三藏
誰能俱不移白頭鑽故紙底是出頭時此恩今欲報四
顧將誰依在佛本無說於公亦何為珍重謫仙人登山
力未疲天涯渺萬里著處即為歸隨緣作贊嘆妙語何
奇奇置之天壤間千古無敢非我生多肉障煩公示寶
範請作一言蔽牟尼即仲尼

送李司錄西赴

晴雲聳奇峰烈日破昏霾謫仙有行色朋僚傷遠送嗟

哉君子人薄書久倥傯文星應長庚勁氣模蟠螭幡然
玉京去佇聽朝陽鳳岩野豈能留端肖高宗夢

塵外堂

俯仰天地間紛紛

闕

山林累人均一體有

真故有妄輕彼那取遺奔走為塵外政應在塵埃憑師
一埽空六塵不用洗淵默即雷聲萬川同一水

枌櫚集卷九

欽定四庫全書

栢欄集卷十

宋 鄧肅 撰

古詩

謝李舍人題額

寸草春未報秋風樹不停三年真忽爾過隙白駒奔廬
墳吾豈敢北堂有老人作庵居釋子佛事勤朝昏太史
憐此意高額揭顯親梁間垂玉筍壁上靄飛雲顧我何
為者傳家空一經栖遲已三十寒燈尚短檠北轅將遠

楚換手或翻羹那能為親顯只可充添丁但念我先人
白首困飄零射策不逢賞青衫脫王庭今焉逢太史發
揮自身名坐令九泉下冷骨復生春顯揚今在此松楸
萬世榮作詩敢論報欲為几上銘

陪李梁谿遊泛碧

涼天夜無雲寒江秋更碧冷照月華中水天同一色畫
船渺中流三更羣動寂清風遠相隨蘆花秋瑟瑟近山
得桂香隔烟起漁笛樓臺半有無疑是化人國我生本

無事釣竿勤水石
今宵更可人仍侍
君子側浪登元禮
舟本非謫仙敵斂
手看揮毫光芒騰
萬尺

本上人

乞食自王城駿筆
揮萬紙開緘動心
目忽忽龍蛇起便
可老煙霞聲價日
千里那知未滿意
更訪枰欄子枰欄
亦何人是心如灰
死想語滿人間春
風自桃李憑君一
笑揮萬事空一洗
但了風動幡在處
真投水願將廣長
舌語出亦糠粃迴
到我輩人政堪覆
醬耳

和作哲送令德

我瓠非五石安能枵不用但恃少年氣未肯就羈鞅越
人已斷髮章甫浪出宋何如子建文脫口人爭諷笑示
善者機綺語時一弄妙竟秘不傳尺管閣雲夢固應羞
芹藻清明奴隸共明年鬱梧桐定作喑喑鳳歸來訪原
憲慎毋學子貢故人猶未病反已能求中

宴坐軒

客食突不黔馬上肉消髀所得知幾何此生亦茅靡何

如豐岩公一室萬緣止竹林能清幽岩竇富奇偉關門
寂無人燒香坐隱几今年忽猿驚杖屨數百里持此凝
宴坐老師一啟齒我心死灰如春風吹不起請君看九
淵止水即一洗

舫齋

寓形天地間一枝慎所處到眼無溪山堆胸自塵土陳
子作舫齋端能世外趨笑傲風波境恬無風波慮循本
魚可觀灰心鷗自舞風景雖可人分手聊四顧紛紛逐

末流誰援沉迷苦吾事在濟川慎勿五湖去

泛舟示子

秋江十日雨破浪飛危檣恍如在天上萬頃煙茫茫狂
風自南來桂花雨新黃停杯不須飲且飲空中香平生
四海心老大愧周郎聊復隨孺子解纓濯滄浪北斗挹
酒漿天孫織衣裳乘興拏舟去一笑上銀潢

黃卷堂

世人無遠韻挾策下浮雲識字僅有數得志無短檠太

丘妙家法不肯鹵耕耘藏書浩無際兀坐觀滄溟寒陋
鄙李邕假書勤朝昏過眼如杜甫散為筆下神一家今
四傑射策到王庭自視猶細事家塾方討論嗟我未聞
道政作鑽紙蠅會同阿戎去從公問斲輪

過黃楊岩

朔風夜號空于喁幾枝木深山自春色芳草不凋綠朋
來得佳遊招提藏翠麓新酒赤如丹竹萌肥勝肉一醉
出門去缺月掛脩竹歸路涉溪淺危橋踐寒玉夜過渭

濱居門庭故不俗對坐寂無兩泉聲如擊筑宗盟更可
人相邀勤秉燭開緘得捷音鯨鯢俱面北迴棹今可矣
賞心嗟未足西去有奇巖佳名配王屋箕踞列十人未
充空洞腹更約林宗俱來伴白雲宿

飛螢

谷雨已十日不散陰雲頑夜風翼腐草借光蒲鶒間往
來自相照似欣天地寬何時東方白紅日開雲端

次韵王信州古風

我昔少年日氣與風雷壯一言既不合掉頭歸望望誓
將老煙霞叩角耕閑曠一日煩干旌叩天舒孟浪自譬
舟一葉沙溪春蕩漾百川倘已東吾力那能障尚賴天
地寬未即崇山放枰欄付冷居乃為世所長老妻畫紙
摹赤脚沽村釀醉起舞彩衣吾道頗休暢人傑又鼎朱
不怕供詩帳酌唱激清風洗空煙雨瘴故人化鶴仙穹
廬共悽愴生還義更高裹飯遠相餉演山見長庚醉眼
不敢仰便結騎跡遊不知飛燕謗蘭亭最後來德齒均

所尚傷時雖慷慨論事尤倜儻杯酒七峰下逸思九天
上萬事俱可人祇欠蛾眉唱

再次韵謝之

四海王信州志氣老益壯家學九域聞人物萬夫望若
使在廟堂天下無怨曠胡為一葉丹也泛閩溪浪顧今
真斷梗江淮付揺漾逢人輒傾倒涉世無隄障既合越
人瘠仍欲鄭聲放斥下九天來宜似幽怪長

一作幽怪
多冗長

邂逅忽相逢琥珀傾新釀火急賡歌詩胸臆賴舒暢我

語無餘韻日書甲乙帳得君驅鱷手不憂潮陽瘴三年
去國心海隅日悽愴東家久不燭稚子誰將餉詩成豈
置之萬事吾不仰那復思重裘區區欲止謗明朝更可
人芒鞋窮好尚遙知翠微中高談得縱儻至樂麴蘖間
虛名鐘鼎上輕重不須論杯行且酬唱

再次壯字韵

昌黎論佛骨南行氣亦壯獻書請鏤玉却起北歸望香
山最風流詩酒事夷曠那知聞琵琶淚濺九江浪此身

苦海中風流隨蕩漾妾見分南北無乃眼中障嗟我果
何人楚狂本天放外物不須論有身今已長斤歸水雲
鄉日醉蓮花釀茗飲過陸羽禪悅得文暢安此更何求
萬里脫羶帳死生則置之北邙豈俱瘴使君憐我愚了
無逐客愴謂我耕白雲不獨齊眉餉詩來覓歡處光芒
不可仰欲醉桃李春那憂貝錦謗赤脚敢云無社舞非
時尚侯門列蛾眉一見吾其儻拋磚此當先積薪君在
上更為李與蘇兩家按斯唱

第四章 蕪簡其子

鳳卜雖蕭條虎筮固豪壯要皆有得失未息助中望那
知方寸地太空等虛曠川逝水不流石高風自浪鄭五

相府榮謝三漁舟漾

闕

鼓瑟鏗

爾捨扶杖曝然放在我本不虧底處更求長獨挂百錢

遊無人捉私釀醉歸一腹春滿紙揮琴暢

風俗通記凡琴曲和樂而

作謂之暢因憂愁而作謂之操

珍重江左王德劭宜絳帳天遣千里來

不顧閩山瘴大言臭味同政可慰悽愴誰知金玉予詩

成即相餉筆力到天心開卷人爭仰但勿賦鬼蔡小兒
易生謗獻之詩更可句法晉宋尚從渠得精深嗟余真
恍儻何當日相從煩君更語上徑追太古風三嘆連十
唱

荔子

荔子有佳品乃在府城東我來方秀發黃雲疊萬重遙
知香味色已具碎花中凭欄一念足不食意自充人世
如夢耳當體色即空謂是為真實便可侑千鍾謂是為

非實真飽亦何從虛實兩無有棲高雨濛濛

避地山谷

大禹不到處石壁誰鑿開雲端欲相搏飛出白雲來餘
沐亂飛雪雄聲敵春雷泝流湧百尺銀山陟崔嵬顧我
雖逐客解雨已春回嗟此天盡處胡為乎來哉堂堂有
垂白蓬室紛提孩內外三百指奔竄若為懷我疑雲水
間亦有天下才何時日三錫一振紀律頽羲和儻中天
六合無氛埃鼠壤與蟻穴不風當自推坐令陋巷中依

舊樂顏回亦能書要荒朝會叩天階

次韵王信州遊棲雲

勝遊出林杪參天僅一分從君如附驥顧我願為雲野
色連空碧幽香襲露薰耦耕當卜此橫笛夜相聞

栢櫚集卷十

欽定四庫全書

柟欄集卷十一

宋 鄧肅 撰

樂府

臨江仙

帶雨梨花省上馬問人底事匆匆于飛有願恨難從大
鵬搏九萬鸚鵡鎖金籠 忽忽便為千里隔危岑已接
高穹回頭那忍問前蹤家留千里外人在斗牛中

右一

百尺危樓初過雨清風凜作輕寒一聲漁笛在雲端黃
昏簾幙捲新月半欄杆青翼不來音信斷雲窓杳隔
三山何時攜手便驂鸞今宵同勝景玉斚不留殘

右二

春雪一甌扶醉玉翩翩兩腋生風柳腰無力殢雲蹤陳
郎投轄意分袂忍匆匆白玉琢盃龍麝泛灩灩天酒
爭濃何妨一飲上青驄晴空行夜月緩轡水晶宮

右三

劍水泠泠行碧玉扁舟一葉吹風玉人招手畫樓東浩
歌隨月去春在小樓中 簾幙低垂圍蕉牀雕腸笑捧
香葱謾將雨意作雲濃單于吹未徹門外響玲瓏

右四

雨過茶蘼春欲放輕寒約住餘芳南園今日被朝陽瓊
葩開萬點塵世滿天香 百卉叢中紅紫亂玉肌自笑
孤光清風剪剪過紗窓餘醒空一洗不數壽陽粧

右五

獨宿禪房清夢斷雞聲喚起晨鐘出門曉月耿寒空小
池凝翡翠竹外跨飛虹梅塢不知何處了傍籬臨水
重重嘯歌只在冷香中人間那有此天上廣寒宮

右六

夜飲不知更漏永餘酣因染朝陽庭前鶯燕亂絲簧醉
眠猶未起花影滿晴窓簾外報言天色好水沉已染
羅裳檀郎欲起趁春狂佳人嗔不語劈面喚丁香

右七

夜靜黃雲承寶轡九疑人道羊家蕊宮仙曲送流霞東
陵分玉井遠勝隔荷花綽約旗亭沽一笑衆驚食棗
如瓜畫橋烟柳忽翻鷗醉鬟傾綠醕參月共橫斜

右八

樓北樓南青不斷晴空總是春容先來無處問郎蹤那
堪風不定雨盡一窓紅初恨水中徒捉月而今水月
俱空謾將雨意伴雲濃臨風千點淚不到浙江東

右九

浣溪沙

雨入空階滴夜長
月行雲外借孤光
獨將心事步長廊
深鎖重門飛不去
巫山何日夢襄王
一牀衾枕冷淒香

其二

傍竹柴門俯碧流
見人無語眼橫秋
鳴機軋軋弄纖柔
定有迴文傳竇氏
何時銀漢度牽牛
歸來風雨夜颼颼

其三

宿雨潛回海宇春
曉風時散日邊雲
熙熙人意一番新
破睡海棠能媚客
舞風垂柳似招人
春衫歸去馬蹄輕

其四

欄外彤雲已滿空
簾旌不動石榴紅
誰將秋色到樓中
瑪瑙一紅浮翠玉
瓠犀終日凜天風
炎洲人到廣寒宮

其五

高會橫山酒八仙煙雲不減九華妍暖風瓊樹倚樓前
妙唱一聲塵暗落靚粧四座玉相連驂鸞何日共翩
翩

其六

二八佳人宴九仙華堂清靜鬪春妍瓊枝相倚妙無前
良夜黃雲來縹緲春風碧酒意留連花間蝶夢想翩
翩

其七

半醉依人落珥簪
天香不數海南沉
時傾秋水話春心
已覺吹簫歸碧落
從今禊飲笑山陰
金盃休惜十分春

其八

海畔山人碧玉簪
天涯消息嘆沉沉
賴逢傾國洗愁心
莫為世情生旅況
且因樂事惜光陰
明朝紅雨已春深

菩薩蠻

隔窓瑟瑟聞飛雪洞房半醉回春色銀燭照更長羅屏
圍夜香 巫山幽夢曉明日天涯杳倚戶黯芙蓉涓涓
秋露濃

又

萋萋欲遍池塘草輕寒却怕春光老微雨濕昏黃梨花
啼鳥粧 低垂簾四面沉水環深院太白困鴛鴦天風
吹夢長

又

飛鴻欲帶春風去柳絲却織春風住去住任春風只愁
樽俎空今朝鞭馬去又得高陽侶半醉踏花歸霜蹄
驕欲飛

又

簾旌不動重餘熱高堂誰送能言雪一笑下人間天風
襲坐寒歌聲雲外去句譜蘇仙語曲罷一樽空飄然
欲御風

又

廣纖細雨連天遠
紗窓不隔斜風冷
花柳自生春無聊
空閉門
雙雙攜手去回首
烟汀暮嬉笑在高樓
知人
牢落不

又

垂楊裊裊腰肢軟
寒溪練練琉璃淺
短艇卧吹風生涯
一葉中
五湖須徑去何用
若耶女烟雨暝沙汀花香
喚酒醒

又

腰肢欲趁楊花去
歌聲能遏行雲住
杯酒醉東風
羈愁一洗空
謫仙清飲露意在飛瓊侶
未醉那求歸新詞
句欲飛

又

歸心謾逐飛雲去
歡情却為芳菲住
翠袖擁香風
寧辭玉斚空
主人承湛露
元是臯夔侶
早晚定遄歸
商霖四海飛

又和李狀元

騎鯨好向雲端去踏花偶為狂朋住語笑凜生風眼高
四海空羊裘衝雨露我是漁樵侶已趁白鷗歸長江
自在飛

又

一心唯欲南園去東山有意留難住曾慣識追風馬羣
今已空金盤盛玉露情絕鴛鴦侶破賊凱還歸沖天
看一飛

南歌子

竹影窺燈闇，泉聲語夜長。
小窓無夢到高唐，獨飲三杯
長嘯步脩廊。月午夜衫冷，
蓮開風露香。欄干西角下
銀潢，我欲乘槎天上，泛寒光。

右一

皓月明顚雪，冷風亂鬢雲。
高樓簾幙夜生春，半醉倚人
秋水欲斜傾。曉雨雙溪漲，
歸舟一葉輕。杳無青翼寄
殷勤，目斷烟波漁火又黃昏。

右二

雲繞風前鬢春開
檻裏粧鳳屏清晝
靄龍香淺畫娥眉
新樣遠山長
比翼曾同夢
雙魚隔異鄉
玉樓依舊暗
垂楊樓下落
花流水自斜陽

右三

澤畔爭擣草車前
自喂牛鳳城一別
幾經秋身在天涯
海角忍回頭
旅夢驚殘月
勞生寄小舟
都人應也望
宸遊早晚
葱葱佳氣滿皇州

右四

訴衷情

送李狀元三首

乘鸞縹緲過三山遊戲下人間
金樽不辭頻倒春色上朱顏
依暖玉掠風鬟語闌闌
惟愁漏短雨散雲飛騎
月空還

其二

龍頭一語定閩山
黃色上眉間
詔書促歸金闕玉帶侍
天顏
攏象板彈宮鬟
唱陽關
從容禁闥若念林泉應

寄書還

其三

從來雲雨過巫山只記夢魂間何如醉逢傾國春到一
瓢顏歌窈窕舞雙鬟掩雲關重城五鼓月下西樓不
忍輕還

長相思令

一重山兩重山山遠天高煙水寒相思楓葉丹菊花
開菊花殘雁已西飛人未還一簾風月閑

又

一重溪兩重溪溪轉山迴路欲迷朱欄出翠微
梅花飛雪花飛醉卧幽亭不掩扉冷香尋夢歸

又

紅花飛白花飛郎與春風同別離春歸郎不歸
雨霏霏雪霏霏又是黃昏獨掩扉孤燈隔翠帷

西江月

臘雪猶埋石巘春風已入梅梢冷香隨馬上瓊瑤不與

時人同到 拍手恐驚星斗高歌已在烟霄醉呼玉女
解金貂笑問何如蓬島

右一

風薦荷香剪剪月行竹影徐徐微聞環珮過庭除恐是
陽臺行雨 玉筍輕籠樂句流鶯夜轉詩餘酒酣風勁
露凝珠我欲驂鸞歸去

右二

生查子

執手兩潸然情極都無語去馬更匆匆一息迷回顧
孤館得村醪一醉空離緒酒醒却無人簾外三更雨

感皇恩

翠竹謾連雲天風不到簾幙重重自熱惱冷香忽至愛
惜當同芝草井花浮碧玉炎威掃酒渴想東隣憂心
如擣納履生疑謾悔懊未容沉李相對樽前傾倒報君
惟短句瓊琚好

一剪梅

題泛碧齋

金人集卷十一
雨過春山翠欲浮影落寒溪碧玉流片帆乘興挂東風
夾岼花香擁去舟樽酒時追李郭遊醉臥烟波萬事
休夢回風定斗杓寒漁笛一聲天地秋

蝶戀花

送李狀元

執手長亭無一語淚眼汪汪滴下陽關句牽馬欲行還
復住春風吹斷梨花雨海角三千千疊路歸侍玉皇
那復回頭顧旌旆已因風月駐何妨醉過清明去

江城子

酒闌携手過回廊夜初涼月如霜笑問木犀何日吐天
香待插一枝歸斗帳和雲雨殢襄王如今滿目雨新
黃遠高堂自芬芳不見堂中携手舊鴛鴦已對秋光成
感慨更夜永漏聲長



栢欄集卷十一

欽定四庫全書

集部

柟欄集卷十

五

詳校官左中允

臣

瑯五珠

主事

臣

呂雲棟覆勘

覆校官中書

臣

汪師曾

校對官助教

臣

胡予襄

謄錄貢生

臣

苗序朱

欽定四庫全書

枌欄集卷十二

宋 鄧肅 撰

奏劄子

十九章

辭免除左正言第一劄子

建炎元年五月二十日准當月初八日劄子奉聖旨除臣左正言聞命震驚罔知所措竊以國家多難無如今日北虜方熾二聖未迴奸佞在朝盜賊滿野若獻可替否之臣挾私心有誤聖聽則天下之患有不可盡言者

顧臣何人敢與茲選臣雖不食偽祿有死無二然比之犬馬僅可無愧而已求其所以過於犬馬者臣實無有若置之言路恐非所宜伏望聖慈追還成命以安愚分臣除已迺遷前去聽候指揮外謹錄奏聞謹奏

第二

臣自供職以後伏暑傷冷且汗且下日加一日狀至危急終未能一望冕旒以吐胸中之所欲奏者然臣貪冒聖時有死無二終不忍巧為身謀矯情求去但慮臺諫

之職天子耳目之官也不可一日無人豈容不才之人
藉此以養病乎臣今幸得國子監待問堂粗可安身臣
欲望聖慈賜臣假十餘日就此將治此身萬一未先朝
露當粉身碎骨求所以為君父之報端不敢在衆人之
後也臣不勝瞻天望聖哀祈之至取進止

七月初一日申尚書省乞指揮初三日再申尚
書省乞指揮初四日准奏狀得旨依所乞初五
日參假放見乞對初六日第一班對

第三

臣嘗備員鴻臚主簿因敵人須道釋板籍以職出拘於敵中凡五十日敵人之情已備知之自粘罕以下至於步卒分朝廷所賜之絹人得五十有五疋計朝廷所出之數以千萬為率則盡敵人之數不過十六萬有餘而已況有陣亡者有疾病者有以事還國者有隨軍以供戰具者其得絹亦與粘罕等以諸色人所占之數當與戰卒中分則敵人正兵固不過八萬耳因得朝廷所與

綾錦等敵人謂之表段當時分俵其數雖同其物不等
金人得錦勃海得綾契丹得絹織之類而九州所得者
雜色而已一日忿然欲起相攻攻則敵兵之心亦不齊
矣忽一日有敵人遇臣泣下臣問之對曰某兄弟三人
荷戈而來伯亡於真定季亡於京城今聞元帥之兵大
集而南方之兵馬動定數州某豈復得見鄉曲耶臣初
不信其語及見其擔夫道釋各有餉飯之人其惶恐之
人語皆如臣所聞則敵兵亦何嘗不怯也夫敵兵之數

既不甚多又加之以其心離其氣怯倘合天下之力以攻之若無足畏者然敵兵未嘗少挫而中國之勢陵遲至此其故何也蓋敵無他長惟信賞必罰不假文字故人各用命不以死為畏耳朝廷則不然有同時立功而功又相等者或以轉數官或尚為布衣輕重上下正在吏人之手賞既不明人誰自勸此正朝廷之大病也臣愚欲望聖慈專立賞功一司用重祿法使凡立功者人自陳若功狀已明輒踰旬日而不得告者有所立之

功同而賞有輕重者有立功之時等而賞有後先者並重置之法常赦不原又專委臺諫官二員提點其事若臺諫不知覺察亦置之法如是則寸功無不錄矣夫寸功必錄人孰不樂赴功名之會乎若天下人人有樂赴功名之心而使之攻八萬已驕之敵則社稷生靈又何患哉惟陛下畱神取進止

第四

臣聞有同腹心之臣然後可與同患難有可與同患難

之臣雖患難之來無足慮也孝慈淵聖皇帝恭儉之德
可追湯禹一旦

闕

於不測正為無同腹心之臣耳

聖駕既出無一人以蒙塵為念者邀上皇則宮臣奉之
邀太子則詹事奉之皇后諸王惟其所欲是舉朝之臣
爭用私心指上皇本支以保其私家耳嗚呼痛哉古未
聞也及偽楚一立則爭拜其庭畧無難色有願為事務
官者以講偽帝之禮有願為奉使者以結天下之心有
閑為宮觀而下為庶官者皆彈冠而起爭為禁從甚者

至有居宰執持樞柄傳呼道路洋洋得志其下下無能者又竭奸諛之心有名犯邦昌即請於朝以改之舉國委然知有偽楚而已倘言聖朝往往竊笑嗚呼淵聖皇帝其無腹心之臣如此烏能保天下哉不在圍城之中者不能盡知往往為奸人游說似是而非以惑其聽凡在城內者又各食偽祿以污其身故無肯為陛下盡言者遂致陛下雖念二聖之未迴而惡叛臣之賣國稍正典刑以立朝綱終未足以慰天下之望而快二聖之怒

也淵聖臨行以批諭徐秉哲託市少物以為路費遂簽御諱如與平交其意豈在物耶正為行計已迫欲速相救援耳豈意舉朝叛臣他腸有在坐視君父如棄路人陛下若不正其罪無乃辜二聖乎臣竊惟去年治王黼蔡京等罪不肯果決費臺諫一年之力遂致邊事有失防閑臣愚欲乞先立罪格然後按籍定刑使凡有司者皆不得以容私焉則一按而定可以絕後患矣諸侍從官而偽為執政者諸庶官及宮觀而起為侍從者與撰

勸進文獻赦書者事務官與因張邦昌改名者是皆已
不復知有宋德矣臣請定為叛臣之上諸執政侍從臺
諫曾稱臣於偽楚及拜於庭下者及願為奉使與庶官
升擢差遣者是皆臣服偽楚矣臣請定為叛臣之次叛
臣之上乞置於嶺外叛臣之次乞遠小處編管仍乞帶
叛臣名目若夫卿監以下庶官也朝廷初不以國士待
之亦安得以國士責之若未嘗升擢及如前所論二等
之罪惟戴偽楚供職不廢以苟祿食而已臣乞赦之然

亦乞籍定姓名從此不復用為臺諫侍從矣蓋其惡無
立也若用此法則一網而盡不惟上可以報二聖之德
亦所以破天下奸雄之胆也使舉朝之臣畧無奸雄則
人人可與同腹心矣予有臣三千而一心此武王之所
以勝紂也況以天下之大而平一隅乎惟陛下察之取
進止

第五

臣竊聞人臣之事君有毫髮之私必有欺君之罪人君

之治天下有毫髮之私必失天下之心恭惟陛下聰明
睿智卓絕今古固非臣愚所能窺測然謂之無毫髮之
私則非臣愚所能知也臣竊見陛下臨御以來首取前
日奸臣請和誤國者如李邦彥白時中吳敏等投之遠
方以禦魑魅天下壯士聞之鼓舞以為中興必矣然自
靖康以來有專主和者耿南仲與其子延禧是也閨門
之內同惡相濟沮渡河萬金之戰過勤王已到之兵今
日割三鎮明日截黃河自謂和議可必無患凡戰守之

具若無事於切切然者孝慈淵聖皇帝亦以東宮耆舊之
故信如著龜數奏之語蓋未嘗不從也又敵人借和用
兵勢不可遏南仲誤國狀已敗露淵聖亦不得以私之
遂遣南仲出使使之自當南仲偶脫萬死以其子延禧
之故遂得從陛下左右竊聞陛下欲進大兵以援京城
又為南仲父子所諫以為和議已成不可輒壞是則南
仲父子主和誤國豈不過於李邦彥等乎此陛下親見
而熟講之矣又不待臣愚再三之瀆也然南仲尚為兩

府以宮觀居閑延禧尚為兩制以名邦自奉雖南仲自擇不過如此陛下何正邦彥等罪如彼其審何容南仲等惡如此其恕豈非以南仲父子於艱難之際從陛下日久耶且天子父也羣臣子也舉天下之臣皆陛下之子豈復更有親疏之間乎淵聖不忍輒棄南仲故有今日之悔陛下之與南仲又何有焉若復容之臣恐天下得以私心議陛下也且南仲腐儒延禧孤陋進退出處本不足論臣今切切不已正為陛下惜耳伏望明正典

刑與李邦彥白時中吳敏等以示天下之公取進止

第六

臣今月初六日以本職上殿論前日叛臣爭事偽楚大小輕重亦自不等欲乞先立罪格一定於此然後按偽楚之籍取叛臣姓名就格斷之庶幾君臣之間皆不得以容私一網而盡不廢朝廷之力逐臣不敢瑣瑣具當時叛臣姓名數奏惟先立二格而已伏蒙陛下謂臣在圍城之中固知姓名令臣具奏臣謹取臣所撰二格以

按叛臣之罪為陛下盡陳之臣所論叛臣之惡者其惡有五一曰諸侍從而為偽執政者王時雍徐秉哲吳玠莫儔呂好問李回是也時雍等今已賜罪獨好問平日端謹不墜家聲一旦與王時雍處事偽楚朝臣為好問痛惜之然當時士人或謂好問有反正之志所以維持王室者不無力焉臣考於名教觀其蹤跡有大不然者始為奉冊使俄為門下侍郎雖三尺之童已皆知其叛矣今陛下擢於偽命之中置之二府是以叛臣而為股

肱之任也其二曰諸庶官及宮觀而起為侍從者如司農卿胡偁太府卿朱宗之為侍郎大理卿周懿文之為大尹盧襄李擢范宗尹等皆起於宮觀以為禁從是也胡偁周懿文等今在桎梏固不足論請論其餘者且金人破城自南壁始李擢盧襄實提舉其事日聚羣小浩歌城上虜已室壕恬然不顧破吾京城實二人也及偽楚一立則由責籍宮觀之中復居近侍之職其不臣之迹已彰彰矣范宗尹昔嘗於宣和廷對揣王黼之志數

蔡京之罪其於梁師成童貫等畧無一語及之奸雄可知矣靖康之初遂竊虛名以居臺諫當官則以奴僕事耿南仲以求禁從城破則以妾婦事范瑗以資口腹及偽楚一立則起於宮觀以為諫議殆不知所諫者孝耶忠耶叛逆之事耶邦昌據寶位犯宮嬪罪已顯著今其腹心之臣尚可用乎其三曰撰勸進文與獻赦書是也且赦書之惡不減勸進其詞云有堯舜之揖讓無湯武之干戈不惟不忠之語可駭天下至於廟諱便不復顧

雖犬馬有所不為朝廷取撰勸進之文者投之嶺外而
以撰赦書者止令分司是不知亦何私於顏博文哉其
四曰事務官者金人已立偽楚之語朝士集議恐不
能如禮遂至結十友作事務官講論冊命之儀搜求供
奉之物悉心竭力無所不至使邦昌安然得陽揖遜北
面而拜者三南面而拜者二揮涕就位以事美觀皆事
務官之力也且陛下登九五之位天下欣躍如獲再生
朝廷不聞有先時而為事務官者及偽楚之立而十友

紛然如水就下此其情尤可惡也然當時詭祕姓名人不盡知今乞詢元提舉官吕好問則十人之迹無所逃矣其五曰因張邦昌改名是也何昌言先奏於偽楚之廷乞改為善言其弟昌辰遂請於部改為知辰惡犯昌字也且當時顏博文之為赦文更不顧廟諱而昌言昌辰切切然惟恐犯張邦昌之諱如此是時羣臣不知果有宋德耶果無宋德耶論至於此臣但泣血而已已上數等臣乞定為叛臣之上置之嶺外所謂叛臣之次其

惡有二其一曰諸執政侍從臺諫稱臣於偽楚及拜於
庭下者是也所謂執政者如馮獬是也從駕而出脫身
而還尚忍行平日從駕之路入平日朝謁之庭伏拜他
人便為君父此不知果何等用心也所謂侍從者其餘
已行遣矣獨有李會尚為中書舍人陋儒無知平昔碌
碌此固不足論也然在淵聖朝既為從官在偽楚朝又
為從官今復因循不失舊物是事陛下如事偽楚事偽
楚如事淵聖畧無彼此之間矣陛下雖尚容之未正典

刑不知李會何施面目尚敢持橐以行於天日之下乎
李會平日嘗與范宗尹對語曰邦昌實無罪而陛下責
之為非切切然為其偽主游說如此信乎桀之犬可使
吠堯也所謂臺諫官者洪芻黎確等及舉臺之臣是也
當時臺中有為金人根括而被杖者四人以病得免其
餘無不在偽楚之庭矣且臺諫者天子耳目之官也敵
騎迫城尚持講和之論聖駕將出曾無一言之戒天作
奇禍則倉黃失措遂居他人之庭復處臺諫之職所謂

節義廉恥果安在哉今日尚有不易舊職者不知其所
立如此又何以論他人之過耶其二曰以庶官而升擢
差遣是也然此不可勝數自偽楚以後謂之權官而被
偽命劄于者皆是也臺省寺監學校勅局無所不有乞
專委畱守司按籍取之則無有遺者其三曰願為奉使
是也黎確之使趙野李健陳戩之使翁彥國擁黃旗持
偽告左右僕從皆受偽恩馬上洋洋自號奉使力說勤
王之師以為邦昌久居之計故邦昌曉諭曰候勤王師

退然後開門蓋恃有一二奉使耳借使一二奉使能巧
為辭說以惑今日之聽臣當問之曰邦昌何為者豈有
朝士乃甘心為之奴僕乎旗色用黃賞人用告皆若所
攜矣此又何自而得之哉已上數等臣乞立為叛臣之
次於遠小處編管若夫庶官在位供職不廢但竊祿食
臣乞赦其罪而錄其名蓋焉能為有焉能為無既不足
責亦不可用但置之而已臣竊觀近世士大夫所論以
謂偽楚之事為金人迫脅無足罪者臣以謂蘓軾誠喜

李白謂白從永王璘也當由迫脅終以李白為豪傑之士殊不知迫脅而從不過畏死耳豈有豪傑之士畏死而亡義乎況臺諫以上朝廷以國士待之以國士而報之以衆人此果何等人哉雖才如李白亦當賜罪況皆凡下奴才無足取者伏望聖慈特賜剛斷無惑羣聽腹心之患既除則邊鄙之虞可以消矣惟陛下聰察取進止

第七

臣近准尚書省劄子奉聖旨令送臣僚所論二章付門下後省其一章論臺諫之職不可觀望其二章論宦官之盛不可不戒臣竊鼓舞以為中興之盛正在此也恭惟陛下臨御以來所用黃門比之上皇僅百之一比之淵聖僅十之一是陛下於此司蓋未嘗不戒也然小人無知尚有敢循舊轍者陛下既責臣以言臣敢默默乎臣於初十日侍班殿下有肩輿而至橫門者羣臣吐舌莫敢誰何嘗試遣人詢之曰內臣陳良弼也臣竊謂百

官下馬外門徒步而入雖雨作泥深滅足沒跗未嘗敢
以為勞蓋君臣之分不敢廢也良弼何人敢爾驕傲雖
宣和以前宦官最盛不聞童貫梁師成等敢用肩輿輒
入橫門者今良弼之寵方之童貫等無萬分之一便敢
輕視朝廷失禮如此傳之天下有損聖德臣竊痛之或
曰良弼病矣不能徒步臣以為不然豈有不能徒步於
橫門之外而能徒步於橫門之內者乎又曰汴河久涸
運漕不至良弼一出則黃流瀾漫一時之功不可闕也

臣又以為不然若恃微功便忘分義則趙普之流當乘肩輿以登太祖之庭矣或者又曰恐得聖旨然後敢爾臣又對之曰此決無是禮也朝廷之儀定於太祖陛下孝德上追虞舜豈忍以一黃門之故輕變祖宗之法乎臣愚伏望聖慈明正典刑以示懲戒不惟消患於未然亦所以弭天下之謗也惟陛下留神取進止

第八

臣於今月初六日上殿論耿南仲與其子延禧主和之

過與李邦彥白時中吳敏等乞陛下明正典刑陛下以謂耿南仲真誤國者今越八日未蒙行遣臣竊惑之謹再為陛下敷奏曾不知其為再三之瀆也臣嘗面奉孝慈淵聖皇帝面諭曰耿南仲嘗薦汝矣臣明日亦以門生之禮謁南仲於府第今此待罪諫省亦何忍獨論南仲父子之過耶然君父之德天下之公也恩門之德一己之私也臣亦安得以一己之私而忘天下之公乎重念四五月間畏日流金雖庸夫販婦亦以行色為難而

使兩朝君父登小車涉險途作止飲食悉付他人之手
親王貴族且數百人一旦蕩然皆在沙漠數千里之外
使道路聞之皆為泣血此何自而然哉主和誤國墮虜
計中正在耿南仲父子耳且臣之君父為南仲所誤如
此義不戴天豈容默然陛下若念南仲父子嘗在艱難
之中久從行在未忍賜罪則臣之言為失矣臣待罪諫
省數奏有失臣之罪也夫何面目尚稱諫臣雖微臣進
退不足以為朝廷重輕然小臣之節則不可以不立也

臣視此命輕於螻蟻

關

之

取進止

第九

十四日拜賜緋勅二十一日上殿臣嘗觀德宗之在奉
天有唐社稷不斷如綫一旦稍定遂訪累頭宮人陸贄
切諫猶不能止此唐室所以衰也恭惟陛下臨御以來
惟知修德前日宮嬪來赴行在猶有卻之者方諸德宗
固已相萬其不邇聲色蓋出於天性自成湯以後一人

而已宋德亦安得而不興乎然陛下出命嘗本乎恭儉之德而奉命以出者或變而為奢侈之事竊恐傳之四海人或不知反以德宗議陛下而不知陛下實成湯也臣職在諫省敢不盡言前日御藥院奉聖旨下開封府買拆洗女童不計數且拆洗云者豈必姝麗耶竊知聖意將服澣濯之衣矣不計數云者豈必多求耶竊知聖意以謂有人則置無人則已初不以定數為限也此盛德之事卓絕今古豈易擬議哉然奉行之臣不體睿意

日差人吏遍走京城凡見女童舉封其臂間有脫者其
行賂已不貲矣搜求之甚過於攘奪愁怨之聲比屋相
聞嗚呼尹開封府者與領御藥院者亦何累吾聖天子
如是甚哉今日外有方熾之敵伺吾之間以肆敘攘內
有偽楚之黨幸吾之失以快私忿陛下安可以纖毫疑
似之迹墮賊計中乎臣愚欲乞速下三省取開封府御
藥院官吏重置之法仍降明詔以榜東京具言陛下所
以買拆洗之意不為姝麗有不計數之語不為多求凡

女童之封臂者悉縱之則陛下恭儉之德上追成湯豈獨左右臣僚得以獨聞乎當使京師之人無不知者仍乞亦榜行在以弭自京師來者紛紛之謗且京師天下之本也京師之人安則天下之人舉安天下之人舉安則社稷宗廟豈有不安者乎惟陛下早圖之

第十

臣竊謂天下之大取諸一身足矣邊鄙有寇若病在四肢民心有失若病在元氣凡四肢之有疾未有不自元

氣之乏者今欲治邊鄙豈可輕失民心乎又況京畿近地所賴民力為切此尤不可失者也去年北敵憑陵再干我師京畿近地悉為戰場十口之家九遭屠戮間有脫者亦僅留餘息耳陛下已登九五之位逃民欣然如獲再生然後老弱相扶稍有歸者然昔日所居蕩為

關

行有餘力復為耕耨之事於今

也事在有司尚循舊例日促秋租以為歲計甚矣謀臣之誤國也昔者周公之相成王必陳王業其詩云三之

日于昴四之日舉趾蓋以謂于昴舉趾倘失其時則歲無秋矣且周正建子于昴舉趾之時在今為正二月之間也今日虜騎四月方遁不知正二月間京畿之民何在哉于昴舉趾既失其時今取其租曾不少恕民將如何天不能雨鬼不能輸臣知百姓將復遁矣若使京畿之民其心已失譬之元氣已不復陽四肢有病其能愈乎此正醫國者所當慮也惟陛下審察之

第十一

臣伏觀近日聖詔戒勅百官使各恭乃職臣竊欣幸以
為中興之道正在此也然官吏之未去者固有戀主之
心雖非聖詔彼已不遁官吏之既去者已不知有君矣
雖有聖詔獨奈何哉臣請為陛下盡陳之偽楚僭號百
官安之曾無一人敢違偽楚者陛下已登九五之位而
官吏懼罪各為計去此其情尤可罪也畱守謁告既不
經朝廷閤門放見又不拜君父一旦得舟而濟往往自
相慶賀問其故則有以省墳為辭者有以省親為念者

有以生事為憂者為百官之計則善矣為朝廷之計則如之何且時適艱難敵人未滅陛下方事巡幸未能歸謁宗廟而百官先欲省墳上皇北狩今尚未還陛下雖念定省之勤且不能致而百官先欲省親汴都九重如天造地設鑾輿行幸猶未暇顧而百官先以生事為憂嗚呼事君如此果何等人也比之犬馬猶有慙德然朝廷常以冗官為慮矣又常以兵食為憂矣若按在職官吏托故而去者盡削仕版而取其所食之祿以給禁衛

蓋兩得也若夫五月初一日已前先假指揮徑走江湖間者其情罪又過於衆人數等欲乞追赴行在付之有司大正典刑以聳天下竊聞太平興國間賓州錄事參軍孟巒避官不之任詣闕自陳太宗皇帝怒甚杖巒二闕流之海島此當時官吏所以無敢擇官者今日士夫擇官求便比比皆是也祖宗已有定法陛下可不適追乎取進止

第十二

臣聞三省近奉聖旨催已召人星夜前來內有周武仲者臣竊惑之不知陛下以武仲為忠乎以武仲為才乎宣和之末金寇已在雲中朝廷應副不勝其弊未有免夫錢之類天下騷動既罷譚稹復帥童貫王黼梁師成等猶敢泰然肆為欺罔奪供軍之物以資應奉武仲時為御史中丞觀望王黼不敢輒出一語上皇深察其奸以謂當時之弊有布衣敢言而臺諫無一言者遂舉臺諫逐之不一月間既罷王黼然則武仲之不忠固可知

矣初結金人之禍雖始於趙良嗣然盧溝之會兩軍莫測鉦鼓一作南北盡奔王黼再遣趙良嗣與周武仲從而議定遂以營平付金人取之營平既為金人所據則下瞰金燕矣金燕既破敵遂長驅此前日之禍所以酷也然則武仲之不才又可知也朝廷痛此固嘗一正典刑矣主其謀者王黼前年殺之為之使者趙良嗣去年殺之若周武仲者則力奉王甫之命共持良嗣之節其罪無以異於二人者縱使勿殺亦云厚矣其可復使之

禁聞以誤國事乎易於師卦嘗曰開國承家小人勿用
象曰小人勿用必亂邦也今陛下正用師而開國之時
也小人其可用耶惟陛下察之取進止

第十三

臣嘗觀宣和司諫高伯振觀望王黼不敢誰何每出傳
呼諫官道路之人皆得慢罵之靖康諫議洪芻阿附耿
南仲不恤國難一日過朱雀門羣小擁其馬以數之曰
國步如此爾所諫者何事彼二人者方其巧為身謀以

竊禁從往往自以為得計殊不知欺君之罪重於欺天故伯振死於白刃而洪芻流於海島皆天有以罰之也臣誤蒙三朝之知實緣論事宣和之末嘗進乞罷花石詩羣臣欲置於死地上皇赦之仍欲召對靖康之初賜對便殿力詆權臣當時指以為狂而淵聖容之尚置於寺監今年不食楚粟飢餓殆不能行萬死一生奔赴行在陛下即擢於言路初望天顏遽論宰執必待其去臣言乃已當時士夫謂臣必踵張所吳給之轍矣而陛下

賜臣以五品之服且褒以聖語謂臣論事甚正當可取
顧臣何人上蒙聖眷如此雖瀝臣之血而膾臣之肝不
足以謝天地之德也然臣之職則諫臣也若陛下曰然
而臣亦曰然若陛下曰否而臣亦曰否是奉天子者也
非諫天子者也雖聖德眷遇未即賜罪然臣獨不愧於
心乎獨不愧於天地神明乎今雖可免異日將如何哉
不為高伯振即為洪芻矣此臣愚所以日夕惶恐而未
知死所也竊惟人主之職在於一相陛下初登九五之

位召李綱於貶所而共之以為國其恃之非不專而禮之非不厚於李綱學雖

闕

謀雖深而機淺

固不足以上副眷注之識任而陛下嘗顧臣曰李綱真以身徇國者今日罷之職其論嚴甚此臣所以竊有疑也既非臺章又非諫職不知遣詞者亦何所據而言之臣若觀望豈復敢言臣愛君其敢默默乎且兩河百姓雖願効死而五月之間畧無統領民心茫然將無所適從矣及李綱措置不一月間民兵稍集今綱既去兩河

之民將如何哉偽楚之臣罪當萬死前日紛紛皆在朝廷李綱先乞逐逆臣張邦昌然後叛黨稍能正罪今綱既去則叛臣將如何哉叛臣在朝廷政事乖矣兩河無兵則北人驕矣李綱於此亦不可謂無一日之長也昔者宣王所以為中興之主者內修政事外攘夷狄而已陛下聖德過於周宣所以修政事而攘夷狄者豈可後哉李綱一日之長亦惟陛下采之

第十四

臣竊謂臺諫之職天子耳目之官也人主之職在論一
相而已李綱誤國朝廷於今月十一日罷之臣備員言
路曾無一語執奏者其蹤迹有類觀望況臣於今月二
十一日上殿奏事復論李綱有可取者二伏蒙聖訓謂
臣所奏一虛一實則臣之不職益又明矣雖蒙陛下念
臣狂直未忍即賜臣罪然恐後來臺諫觀望成風臣見
居私家待罪不敢供職伏望陛下明正典刑取進止

第十五

臣竊觀前日臣僚上言有論僞楚之臣止論王時雍徐秉哲等未嘗輒論呂好問且王時雍等僞執政也呂好問亦僞執政也論時雍而捨好問豈非以好問今為右丞乎右丞之職天子命之也雖賢與否不得以盡知然僞楚之朝始為冊立使俄為門下侍郎此好問之迹亦昭昭矣論事之臣亦安得漏網以罔天子之聽乎謹按好問本非奸雄但怯懦耳從王時雍遊致有叛臣之迹皆怯懦所致也今雖居宰執亦不能為朝廷患然國家

艱難急於求賢豈容有怯懦無立之士廁迹於二府乎
好問在朝則偽楚奸臣必不盡責蓋有以蔽之也臣又
聞中書舍人李會至今會語人曰張邦昌有伊周之志
非逆謀者其推戴偽楚之心猶昔也謹按李會嘗拜偽
楚之庭甘為禁從今日復廁朝班有愧同列遂為巧語
以蔽邦昌嗚呼衣天子之衣而坐天子之殿降勅令以
朝百官擁殿班以稱陛下邦昌反狀雖三尺之童亦知
之矣其臣李會不知何辭尚敢為之遊說乎且以邦昌

為是則陛下責之為非是邦昌而非陛下信乎桀之犬
可使吠堯也臣所論叛臣乞陛下定罪章疏再上未蒙
陛下一正典刑臣竊考叛臣在朝今居二府者呂好問
也今作從官者李會也臣愚欲乞先正此二人之罪以
去其大者然後乞檢會臣所校者叛臣八種定罪二格
一網而盡俾無遺漏庶幾可以少釋二聖之怒以慰天
下之望也惟陛下斷而行之毋惑羣聽取進止

第十六

臣竊觀發運司歲計五百餘萬每歲入貢艫尾相銜畧無虛日崇墉比櫛不容升合之欠朝廷費出且無餘者今年不知何以處之去冬自遭圍閉運漕不通今夏又以隄岸失防汴流久絕校之每歲所入蓋未有百分之一也竊聞之已入汴口者有百六十萬此數之外未有繼者朝廷欣然便以為有餘殊不知京師所集止於八月九月已後俟去年冬季每月之費在京師者以二十萬為率在行在者以十萬為率又有糴場二十四所并

勤王軍兵捉門防巡人兵口食等兼非泛取索數目會入汴口之數僅支五月食耳五月之外將如之何倘虜人絕迹不復南渡則運漕相繼未有已也若犬戎猖獗再干我師不知軍民替替將焉就食此事最急不可以倉卒備也舟船有限日數甚迫雖發運百人亦無如之何矣臣愚欲乞諸州選才幹官員代發運司各運逐州歲計往赴京師近地期以十月以前足五十餘萬之數凡舟船人兵與其餘所費之物各責辦知通乃以公使

錢代支國家艱難之時雖三二年間公使闕乏未為要務協數十州之力人各自勸又立賞罰從而驅之則糧道又何患哉昔蕭何給餽餉不絕糧道漢高祖自以為不如蓋當時糧道若或不繼雖有韓信亦將何所施乎惟陛下毋忽取進止

第十七

臣於今月初八日以本職上殿因奏論次遂言夷狄之巧在文書簡簡故速中國之患在文書煩煩故遲今日

事勢豈可遲也面奉聖訓曰正此討論欲併二者盡依祖宗法臣竊欣幸以為太平興國之治可以指日而望矣恭惟太祖太宗之時法嚴而今速事簡而官清未嘗旁搜曲引以稽賞罰故能以十萬精兵分布四海取嶺蜀平江南來吳越下河東紛紛萬國莫不稱臣混一六合如指諸掌此一時富庶所以遠追成康而豐功偉績又有以過之也自時厥後日趨太平羣臣無可論者今日獻一策明日獻一言簡髮數米惟恐不備此文書所

以日益煩而政事所以日益緩也厥今天下如何哉兵
戈未息邊鄙未寧朝廷措置當如救焚如拯溺豈可揖
遜進退尚循無事之時乎臣以謂英烈果斷非太祖太
宗之道不可學也比嘗有討論祖宗官制之命矣今越
兩月不聞所正者何事豈以為用兵之際未暇及之乎
殊不知用兵之道正以此為急務耳蓋法祖宗以考官
制畧虛文以稽實效者用兵之本也不務其本而欲齊
其末臣所未聞臣愚欲乞專委宰執辟禮官數人限以

旬日期於必正庶幾法嚴事簡如出一人賞罰之權不致濡滯將使天下嘆曰太祖皇帝今復起矣蠢爾小虜何足道哉昔高宗為有商中興之主為之舟楫鹽梅者傳說一人而已其言則不過曰事不師古匪說攸聞蓋中興之道未有不以古先為念者惟陛下斷之取進止

第十八

臣嘗謂巡狩之禮非偶然者春則省耕以補不足秋則省斂以助不給憂勤之心亹亹不已惟恐天下之疾苦

不得以上達而九重仁政不得以下布耳崔驛南巡之
頌嘗云班雲行之博惠散雨施於庶黎正為此也陛下
即位之初首巡睢陽雲行雨施之傳當自此邦始使天
下引領而望之曰俟我后后來其蘓如是鑾輿所幸孰
非金城乎倘以軍興之際一日二日萬幾若未暇恤焉
則百姓將蹙額而相告矣傳之天下速於置郵萬一他
有巡幸當有深可慮者臣竊聞夏四月陛下臨御之初
應天府下諸各邑索供奉物至今有不還其直者臣實

駭之兵火之後居民離散一得真主如獲再生州郡不能省此復取膏脂而畧不加恤誠忍人哉陛下不及知民間不得訴安於殘忍者又以為不足言此宋都之民所以至今未蒙實惠也且宋都陛下即位之地也民心憂樂天下將取則焉臣愚欲乞陛下峻責當時供奉官吏不還其直者且今朝廷償之大榜諸邑俾仰體聖意庶幾四方相慶曰天子聖德如此其巡幸所至又恤民如此民心一定陛下何往而不可哉昔者太王避狄事

之以皮幣犬馬以至於棄土地真若不復振者卒能肇
基王迹歷年八百其故何也蓋當時去於岐山之下民
之從之者如歸市民所不能去則天亦不能違矣此邦
之所以興也書曰天視自我民視天聽自我民聽惟陛
下察之取進止

第十九

伏觀十三日赤氣夜起橫貫斗柄士夫驚嘆莫知所自
況職在言路者又當如何竊考自古天變人主所以謝

之者不過避正殿減常膳而已陛下自登寶位未嘗輒居正殿而飲食菲薄幾同臣下其所以事天者蓋亦無所不至矣而天變若未息焉其故何也蓋嘗考康定元年春正月京師大風晝冥經刻是夜東南有黑氣橫亘數丈赤兵氣也黑殺氣也用兵之時豈免兵氣乃於殺氣則為變尤大矣然仁宗之時則朝廷無事人物繁庶其致治之道過於成康是果天變不足慮乎蓋仁宗皇帝應天以實而不以文此天變所以不能為災也陛下

切切願治之心固無愧於祖宗矣然風俗頽壞為日滋久雖欲正之不能遽革故今日綱紀未肅賞罰未信叛臣未去奸賊未滅比之仁廟猶有愧焉此臣愚所以痛心疾首而不能自己也臣愚欲望陛下下責已之詔來切直之言號令必行毋使壅遏所以肅紀綱功過並錄以稽邪正所以信賞罰按偽籍以考張楚之臣不使輒居侍從臺諫則叛臣遠矣驗刑賞以責貪污之吏不使分布內外要職則奸賊滅矣如是則陛下應天之實亦

無愧於仁廟雖有殺氣亦不害四十餘年平治況止於
兵氣而已耶蓋天心不遠人心是已有德於人則無愧
於天不必於人心之外更求天也五季之末康澄嘗有
言曰為國家者有不足懼者五有深可畏者六陰陽不
調不足懼三辰失行不足懼小人訛言不足懼山崩川
涸不足懼蟲賊傷稼不足懼賢人藏匿深可畏四民遷
業深可畏上下相循深可畏廉恥道喪深可畏毀譽亂
真深可畏直言蔑聞深可畏蓋天變不常所以戒人君

倘能自慎何足懼耶人事不修所以兆禍亂苟不知戒
斯不亦可畏哉陛下於其所可畏者而加慎焉則所謂
不足懼者又何能為陛下累乎惟陛下察之取進止

栴櫚集卷十二

欽定四庫全書

柟櫨集卷十三

宋 鄧肅 撰

文

不校

孟軻不與橫逆之人校曲直而與齊宣王論達尊韓愈
不與高閑文暢校夷夏而與憲宗論佛骨韓信不與淮
陰少年校勝負而與項羽爭雄藺相如不與廉頗校上
下而與秦王爭割地蓋不屑屑於其小者所以養成其

大也揚雄不肯屈節於董賢而甘為王莽之臣柳宗元不肯下氣於皇甫湜而甘為王叔文之黨李忠臣赴君父之急能斥日者之言終不能拒朱泚之命卒以叛誅李陵能以匹馬力戰極邊終不能輒出一語上抗虜廷卒負其君為左社之鬼蓋遇細故則竊虛名臨大節則顧死生此小人之事也大人何取焉古之所謂大人者體均天地而氣通陰陽天地覆載之中不却蛇虺陰陽寒暑之變不恤怨咨但推一元之氣運量斡旋於太空

不可窮極之間乾闢坤藏春生秋殺又何必物物與之
校可否乎若乃小人則一切反是余嘗譬之以狗飽食
糞穢盤旋戶外伺有至者不問淑慝瞋目碎牙聲氣俱
厲將搏而噬之然後為快於心顧其性皆真若有守而
不負其主者倘有客焉委骨於地彼則搖尾而進欣然
就之視曩昔切齒之人便為恩地亦豈暇顧其主乎此
大人小人之辨不可以不察也晉語有之人才相去不
啻九牛毛蓋嘆其相絕如此顏子於此犯而不校蓋不

與校也小子其志之

祝詞

惟金人息兵沙漠將大寇攘我方再造區夏弗克念帝
乃拜臣左正言臣用夙夜慄慄危懼曰有宋宗社幾百
有八十載今日存亡勿繫於百職事繫於冢宰暨二三
議論之臣臣罔有舟楫克濟巨川謹拜手稽首告于皇
天后土請自戒者三其一曰罔以國事用報我私德其
二曰罔以國事用報我私怨其三曰罔以國事用資我

富貴服食既盟之後二三其德以惑我后之聽臣當拏戮臣既單厥心而罔有嘉謀嘉猷可告於后惟天祐之嗚呼惟天聰明惟天念我太祖太宗之德勿忝堯舜文武惟天嗟我九州赤子切切願治若歲大旱徯霖雨惟天察彼戎狄憑陵中土熾于獫狁獯鬻天用牖臣俾事罔大小臣咸知入告于后后克從德政惟新天下悅服蠻夷寇賊弗干我邊陲萬民奠居邦其休哉庶幾臣小子亦克遄歸省厥母于北堂若臣小子弗克有濟惟天

斥之俾投荒服速登俊良救民于水火毋俾小臣以蠹
我家邦

原直

世人嘗謂窮達自天余以謂窮達自人非天也何則伯
夷餓柳下惠黜孟軻不用於戰國之末韓愈不得安其
身於朝廷之上比干剖心子胥抉眼眞卿杲卿碎其身
於賊手是為直必窮矣子貢得駟馬蘓秦得六印宇文
士及得安其職張禹得全其身崔日用得學士宋之問

得館職楊再思得宰相是則為佞者必達矣夫為直者
必窮為佞者必達自古及今莫不皆然夫豈天哉雖然
人生世上不過數十寒暑盛衰得失如蟻穴一夢耳於
此枉道喪節以干妻孥之奉一時沛然自謂得志殊不
知萬世之下使人聞其名而唾之僅與禽獸比若正直
之士雖當時身不絲腹不粟斥竄流離真若可憐者然
所謂浩然之氣歷千百年猶與日月爭光以此校彼孰
久孰近故君子寧餓寧黜寧不用於世寧不得安其身

於朝廷之上至於剖心抉眼碎於賊手亦寧任之惟直
不可變耳余生蹤迹幾遍天下求其不以窮達生死少
變其直者雖間有之要不可以多得也建炎初余謫歸
沙邑有主簿虞君茂實諱某者相遇視其貌溫而謹聽
其言真而信退竊自幸曰是必學者非止為科舉之士
耳予以得罪至重流落益久君又安於小官不能遽去
忽忽相從且三年矣視君所為猶一日也與人無親疎
貴賤一切以誠心待之聞人有善欣然若已有得及論

朋友之過雖面顏發赤勿顧也其事官長亦不能少變辭色作寸進計顧雖齋庖索然殆不能煙青衫百結如霜後葉其自處如得志嗚呼君真坐直而窮者君真不以窮而變其直者此余所以願與交遊之末不敢以罪逐孤蹤自為君棄也孔子論三友以友直為最佛氏論四友以華友稱友為可鄙蓋華因時為盛衰稱視物為低昂此豈可與正直之友同日而語哉君今別余而東矣恐無規余失者余于是黯然作悲惜君之行也作原

直

弔墨跡文

曾侯藏東坡墨跡十軸端友取其二歸而玩焉殆忘
寢食時有同學之友見而駭之曰異時之文何可尚
哉伺端友之出也於是焚之今十餘年矣端友此恨
尚填胸臆楫櫓鄧肅志宏作文以弔焉其詞曰

孟明之舟田單之牛楚王之象晉帝之裘施之於用無
或不周一旦火之若不當惜蓋事有大於此者而又何

足留哉先生之書顧其此儔一遇按劍回祿是投聞者
奮起欲追無由此氣憤然徒吞九州嗟嗟先生凜凜高
風道學卓然一世獨雄文中之虎人中之龍我筆無舌
安能形容獨喜其書天下之極虞員歐方顏筋柳骨體
雖紆餘精英不沒其或得之如藏白璧道既不行四海
馳驅讐者疾之毅欲掃除書何預焉亦復焚如蓋怒之
所移有及於水中之蜩而惡之已盛遂延廚下之胥也
嗚呼惜哉古人或屈于庭下以干訟牒或忍於斲棺以

求遺法或見石鼓而長歌欲以隸諸生之業先生之書
不減若人世間俗子乃爾毀滅豈書孟嘗之券馮歡持
之以奔走豈書竺乾之文退之為之去取必精妙之至
貫古無友直與六經相為先後李斯見之又將以愚黔
首矣吾聞樂巴巽齊郭憲巽蜀劉崑降雨于江陵天使
赦財于糜竺是皆奪之于煨燼之中而傳之與已骨之
肉先生之書獨不合焉吾知天使之未賢而三子亦碌
碌焉者耳嗚呼書乎今何之乎紅焰烈烈其可追乎將

歸於日月助其光明乎豈吐為長虹以攄其不平乎將
激為飛電以神其威靈乎豈散為星斗以顯於天之文
乎其煙氣蓬勃上徹青冥亦將化為卿雲以瑞天庭耶
亦將感而為膏雨以澤生民耶亦念彼鄭衛之聲紛焉
雜出將化為管中之灰以正其音律耶抑亦視彼狂瀾
混混之中若滅若沒又從而哀之乃積為女媧之石以
拯其陷溺者歟雖然是皆不足為先生道也先生之譽
雖走風雷先生之心實若死灰心且灰矣書何有哉寶

之聊耳焚之奚哀

誠子

一日之計在寅一年之計在春一身之計在少此陳了齋之言也木之就規矩在梓匠輪輿人之能為人由腹有詩書此韓昌黎之言也大丈夫不時時以古今澆沃胸中覽鏡則面目可憎對人則語言無味此黃山谷之言也余長子譜偶請余書余曰師節義於陳學古文於韓而習句法於黃當於妙年先味此三語勉之

栢欄集卷十三

欽定四庫全書

耕櫚集卷十四

宋 鄧肅 撰

書

上龜山先生楊博士

鄉姪鄧某謹裁書上提宮博士先生閣下嗟乎世人學者急於爵祿之奉綴緝腐語以追時好凡不可以取青紫者無復給視窮年兀兀老死章句識者悲之至於卓犖瓌奇之士未始數數於此者則必箕踞高吟遊心景

物收拾天地精英以實錦囊直鄙時輩為嘈嘈蠅蚋若不可與之言者殆不知畫餅象龍均於無用又烏可以五十步笑百步哉幸而有知讀聖人之書而求其所以言者不得於經則必求於世儒之說即世儒之說而求之其親見異聞往往出人意表恍惚變化不可捕捉凡所言者皆人之所不可言凡所行者皆人之所不可行悉心竭力莫知所歸則又將去而之佛老矣嗚呼道之不明真學者之不幸也某於衆人不幸之中若天與之

幸者得遊於今壻知默之門雖駑鈍之質不能窺測其
涯涘然竊嘗聞之知默之言得於先生先生之學非有
瓌偉倣詭之論喬詰卓鷲之節以聳世俗之觀聽獨於
行止疾徐而知堯舜之道於不為已甚而得孔子之心
其所言者人皆可言也其所行者人皆可行也某之心
於是知所嚮某之力於是知可以勉矣蓋亦嘗因其可
言者以思其所未能言因其所可行者以思其所未能
行時見先生卓然不可企及嚮風之行願識之志往往

參前倚衡如或見之今先生去而家於毗陵徘徊鄉郡
某適在此幸可以瞻拜屢寫此某所以輒布區區之誠
仰干將命初不知其才之可進與否也昔儀封人將見
孔子曰君子之至於斯也吾未嘗不得見也古之人其
樂見君子也如此然儀封人之賢否雖不可知而其姓
字且不見論語則亦必其無大過人者某雖不肖不足
以望君子之塵至其樂見君子之心於儀封人若無甚
愧不識先生肯與之一見否干冒威嚴惶懼之至

上劉延康

某月某日南劍州上舍貢士鄧某謹齋戒沐浴裁書束
拜寓獻判府經畧大學相府先生鈞席某嘗讀顏真卿
杲卿及張巡許遠四公列傳見其為唐社稷奮身不顧
守節死義名高日月未嘗不拊髀而嘆曰嘻天地英傑
之氣勃鬱未吐不知幾千百年乃鍾若人以為萬世標
準是其可多得哉故天下之人有脅肩諂笑能容悅者
亦不敢借此數公以諛今之君子雖好大喜功不計能

否欲近配古人者聞此數公亦必悚然起惕然懼歉然
而不敢當也嗚呼是果不敢當乎抑有待而後傳乎天
地英傑之氣亦安知其不再吐耶今年睦歙寇嘯山谷
奮臂疾呼而羣小附之攻城圍邑江浙騷然官吏狼顧
喪魂沮魄棄城而遁者不可勝數會稽大府又賊所必
爭之地奔命來寇動以千計中外聞之莫不為之股栗
也而判府大學報國赤心可動天地驅兵力戰卒保城
池使賊衆纍然卵破草折是可謂障百川而東之迴狂

瀾於既倒者也其視大唐四公又不知孰為優劣哉雖然平原日寤真卿棄之常山力竭杲卿死之睢陽之救不至張巡許遠亦連頸就戮夫真卿之去雖出於不得已要非功成而名遂者三公死節雖人所難然身可死也其於民社之寄無乃誤所委乎故以功烈論之則四公猶有所愧獨於先生一無疵焉蓋節義等於四公而勲又遠也嗚呼至矣其不可企及哉此非特某之私言也乃天下之公論亦非特天下之公論也顧雖如先生

謙沖退託亦不能自謂其不然也以今之人慕彼四公
且勤若此至不知天下之人企望先生之盛德復何如
哉某雖無似其生得與先生同時且家於閩中而喜於
從學又獲與今弟為蘆鹽之友家於閩中是鄰先生之
居也喜於從學是習先生之業也復與今弟為友是其
姓字可以達於左右者也其天幸如此顧雖家有老母
不能遠去掃門執鞭以快平生之願而揮毫染翰寫此
精誠亦安得獨後於衆人乎雖然亦僭矣以一介賤士

而千萬世之功臣貴賤賢否不啻霄壤其率爾之罪固亦不勝誅亦何恃而敢為哉蓋先生既立已然之功必建未然之策雖竒謀妙筭已定胸中而芻蕘之言或有可採者此某所以願有獻也某無他能解頗通古今曩聞盜賊之興私竊念某既治其已甚又欲阻其方來故仰求縉紳先生之論俯採匹夫匹婦之言考諸古而不違質諸今而可用研精極慮得十策焉欲進九重恨無因也効死有志窮鱗可惜謹寫之別卷以干台視伏幸

先生畱頃刻之暇聊賜一觀或無甚謬有可用者惟先生委曲而審處之非某敢自擇也昔者有為浙東觀察使者張籍相距於五千里外輒以書寓達而不以僭易為嫌得非學者所為大小君子當有以恕之乎又況籍盲於目既為廢人矣且不能遣語而託韓愈代之又其區區所以自叙者亦不過錢財以濟於藥耳是皆所無足取也某雖晚進不足比數於人然論才與志則非籍比倘使今日得出甄陶之下而不與草木同腐則竭力

自効亦必不至為閣下辱也區區毫楮豈能既此心哉
干冒鈞重不勝惶恐慄戰之至

代人上縣令時年十五

某聞士人趨走王公大人之門有為名者有為利者有
不為名利者為名之士朝夕汲汲兀坐冥搜一篇之出
惟恐人之不已知也為利之士訴窮叙德緘封求謁號
寒啼飢若不能朝莫者有不為名利者其患難之人乎
某也無狀蓋將患難之事仰首一鳴以期左右之見念

矣某棠如垂磬地無置錫家父執役於公以給伏臘而
某不免寄食於村落與十數學生相聚少資束脯以申
反哺之恩驅馳近歲昨日方還雙親欣然遂寬倚門之
望殺雞為黍各相勞苦父輕醉且遽然而起曰公有事
焉不可緩也遽到公庭雁鶩以進反以酒故遂陷囹圄
嗚呼痛哉一歲之勤將成一日之歡又豈知一日之歡
反作一家之禍乎幸望先生察其終始之情原其平生
之迹若果酣酒無賴舞文犯法者先生罪之某復何言

哉但痛心疾首而已矣若歲暮冬寒父子忽然相覩閤門之內把酒相勞則其情可恕某今日伏拜庭下幸先生垂骨肉之恩故雖殞滅亦不足為先生報也憂懼之深言不成章俟罪而已

與胡左司

某頓首再拜丞公左司老兄某平日議論動與時左脫身風波荆棘滿路流落海邦不敢齒一時縉紳之列比者邂逅人傑從遊許時每聞勁論浩然欲塞天宇下視

異類誓不比肩然後知吾道猶行於士大夫之賢者使
抑鬱無聊之氣亦可以少慰其萬一也自左右持節西
歸峻遷宰屬念欲上狀以致區區且以謂左右問學淵
源蓋有所自而議論英發出人數等勤勞最久尚居庶
官之右此又何足以為左右慶乎雖然社稷安危之所
託四海生靈休戚之所繫一時賢不肖之所以進退實
在乎廟堂諸公耳今與廟堂諸公反復議論能可乎
其間者二三都司而已然則左右新除顧不亦重乎若

吏抱成案則占位惟謹謾不省何事此固無可言者若
以平日愛主憂民之心施於仕宦可行之地而從容乎
二三知己之前此亦何惜而不盡言乎倘使吾言行於
廟堂之上而澤及乎九州之遠則吾道固日行矣又何
必身到廟堂然後為道行哉然廟堂之論其來舊矣熙
豐間如司馬溫公與王荊公之所爭者曰是非崇寧
間陳了翁與蔡長沙之所爭者曰治與亂靖康間李丞
相與耿門下之所爭者又不特是非治亂安危而已其

存亡所繫乎夫以二百年社稷存亡之機止在今日議論間聞之今人食不下咽則廟堂所以贊人主者與夫左右之所以助廟堂者亦豈可嘗試為之以苟歲月耶此事非公不可責非某不敢以責公亦幸祕之毋示他人也經曰有言不信尚口乃窮此道固窮於時矣豈窮於吾人哉惟丞相察之溽暑伏惟台候動止萬福更乞加愛以膺三接謹具啓不宣

與李狀元工部

某頓首再拜順之工部狀元老兄自羅源人去忽忽具
狀併以惡語呈浼想無不達者即日溽暑伏惟台候動
止萬福某客此餘年巢南之念無食頃置但以鄉里殘
破之後斗米千錢雞豚蔬笋一切無有疫癘大作死亡
相枕遂不能即去且復須止耳但不知仰俯三百指意
將安歸乎水到渠成之語東坡其欺我哉雖然窮中之
味非吾輩不能堪非處之久不能知其味之永也頃在
都城陷身虜帳幸而脫歸又落風波之地烈士梟首時

無不免賴聖主赦於必死遂獲南歸方安畎畝為終焉計又為寇盜所迫來客海隅今雖困卧流離豈不愈於前日九死之地乎以此亦能自安幸老兄毋重為小意念也老兄湖南之行竟可免否蘭省亦豈能久留老兄耶官無大小要行其志志不可行則袖手旁觀一時士君子進退出處之節彌綸獻替之道與夫談笑議論之餘其善者固可師而不然者亦可戒此杖藜觀物化亦以觀我生之義也豈不愈於紙上之學乎順之學富識

高追配古人固無事此然舍此亦無以寓吾志也蓋所
謂優哉游哉聊以卒歲耳丞公數相過否輒以數字浼
之議論狂直殊愧犯分然吾徒所以相好政在阿堵之
中知我罪我俱在春秋乎貫道早晚如閩中想遂相從
予安失意將不安此德和將罷新任文明亦以替去迴
首前日鳳池之遊豈非夢耶然人生孰非夢聚散無常
即生滅法於此思之則生滅俱滅又何足計乎欲言無
窮恨不能多幅何日握手一笑以寫此心臨紙東瞻精

爽俱遺更冀惠序加愛以壽君親

答黃德美

某頓首某斥逐屏居精爽夢夢忽接來教詞意炳然固已驚畏徐門二章浩然有御風騎氣之興不覺掩卷而起曰天其或者遣此英才以慰我亡聊乎士人中固有高才者但筆力無來處流為馬異李赤而恬不知怪刻舟膠柱泰然自以為得意此有志於文墨者所以為其太息也德美句法抑按已逼蘓黃此天下士也豈易得

哉然子路終身之所誦者孔子以為何足以臧蓋待子
路非衆人之比耳德美浮沈里巷間能不作富貴之念
乎能不恤世眼之青白乎能不畏禍患死生之逼人乎
某聞志在一邦者當恤一邦之毀譽志在天下者勿恤
也志在天下者當顧天下之重輕志在萬世者不顧也
德美來書尚介於一邦此非僕所知也孟軻之文雄於
戰國韓愈之文妙於李唐惟能不介其小者故能若是
其大也蘓黃之文幾於比肩及其絕塵黃且瞠若豈筆

力之罪耶然東坡謫居海外若不復振者而剛大之氣
尚充塞乎天地之間山谷稍不得意則作小偈以贊王
介甫間於東坡微有譏焉則生死富貴已懾其氣爾所
以為山谷者果安在哉吾黨均學蘓黃者也中有涇渭
不敢獨享因書以告君子無以示外使不知我者而怒
生癭也某近有數篇但謫籍不敢寄遠有新作無吝見
示未會切告為器業自壽不宣

答張居實

某頓首再拜久別辱書開緘如見君子寵喻詳備非愛
人以德者不能也某何人當宣和之末見九州需索東
南一空而花石之奉鼎沸無已學校諸生仰瞻白雲俱
相顧泣下且自度曰聖天子未嘗殺一諫臣士大夫吞
聲端坐願固位耳偶得數章槌鼓以進雖為齏粉不顧
也聖意包荒未賜誅殛今得邸報乃有召命是將責我
以前日未死之軀以為今日報也白日尚在赤心敢渝
區區牛李豈所學哉異時有違此語公當出之則僕有

何面目更行天日之下耶反覆來書蓋知己者以報公
所以不得不盡也春且老傳道佳勝未見幸為吾道自
壽不宣

栢欄集卷十四

欽定四庫全書

耕欄集卷十五

宋 鄧肅 撰

序

瑞花堂

政和間有瑞花生於葉隆吉超然家狀如牡丹紅瑩不
謝而未嘗有根衆雖異之竟不知其為何物也超然一
旦抱其所能貢入成均且十餘年靖康間以智謀中科
得官未試建炎二年再擢進士第易紫衣藍歸拜其親

里閑榮之友人鄧肅志宏為榜其所居曰瑞花堂且語之曰物亦有不根而生者乎草木無有也造化之英不能自鬱其達而在上則有輪囷之雲扶疎之桂行於天而行於月若無俟乎根者其降而在人也則所謂將相公侯寧有種乎是也今超然以寒儒家連取文武二科猶掇之也異時將相蓋唾手可取較之卿雲桂月初不試根若無甚異者然則瑞花之生豈偶然哉雖然闇者須明月乃燭之旱者求蘓雲乃澤之彼蒼蒼者豈徒為

是無種之物以駭人哉蓋以種種而生者政有賴於此耳超然其勉之吾輩所為將相云者亦豈徒為觀美而已乎今天下須明求蘓者蓋不可一二計超然其勉之建炎三年七夕鄧肅序

丹霞賞音文集

邵武軍泰寧僧明蹟走人四百里以書抵予曰吾師得士大夫詩文亡慮三百篇雄文傑句日傳千紙師不得以私之也僕將鏤於板命之曰丹霞賞音集夫子厚於

吾師者請為我序之余告之曰若師農家子忽有所遇
遂傳心印坐斷白雲法可參又能出其糟粕作詩誦三
昧如畫沙印泥不事雕鐫雖貫休齊已等輩旬鍛月鍊
有不得其髣髴者又何待士夫為之賞音乎而況三百
篇之中有為社稷臣者有為文章伯者有為道山之秀
者有為柏臺之英者有宣埋輪之威者有布愷悌之政
者有布衣韋帶而尚友古人者鉤章棘句光芒相薄皆
不在人下而又何待潦倒不堪者從而序之乎雖然世

間遊戲法門類相假合若以序為不必為則諸公之文
雖不必作可也若以諸公之文為不必作則丹霞之迹
雖不顯可也是將頽墮委靡蕩然不可收拾而與兔角
龜毛同歸於無用之域矣豈中道哉蓋聞七佛之出世
達摩之西來與三藏四萬八千卷之流布於六合内外
者譬猶煙雲出岫本無定體而風行水上偶爾成文故
其建立之迹闡揚之音雖轟若雷聲而亦未嘗不淵默
也然則丹霞示現之迹士夫從而賞之明蹟從而刊之

僕又從而序之是亦循斯須矣又孰有不可者哉丹霞
法名宗本棄妻而庵居得度五年風號露泣之地化為
金碧太守請於朝以名其院所謂丹霞是也世間人或
得其誦者即以吉凶壽夭決之猶著龜也此特其善者
機耳丹霞豈作意哉明蹟作字吟詩亦超然不凡而見
解的的不落一邊蓋其師之嫡嗣云宣和七年中元瑞
芝軒書

丹霞禪師行化

曾子固嘗言世人視損一錢可以易死寧死無所損余始惜其言之過既而久處里閭乃信其言之不妄也今本禪師一瓶一鉢來自丹霞以開田因緣化於沙邑未踰月而所獲幾百萬是何其速耶豈吾鄉居民固不若子固之所言耶不然則師亦何自得此於人哉怪而問焉有對者曰嘻師異人也其言人之禍福死生輒以期至故智者多其能愚者冀其福敢為不善者又將隱其過此所以摩肩接踵各據所藏無敢為師者以是集事

又安得而不速乎余仰天而笑曰夫有是哉夫所謂丹霞者豈晉佛圖澄耶豈唐僧一行耶明數以先人之禍福雖草而著

闕

如龜類能及焉吾又何為而心醉哉雖

然亦有可占者乃往見之興居之餘遂即其所言禍福死生已著於人者聊復訊之師方且悠然而辭若不以是而自多也夫既不以是自多則必有超乎世者余乃易色變容不敢以世俗之所問者叩焉徐而聽其款語味其所詠之詩超然不復塵中見解禪不能枯律不能

縛雖如我等亦不能測其涯涘殆不知其果何人也其
與人之頌若所為文初不經意一瞬百紙颯如風雨豈
以錐畫沙乎豈以印印泥乎抑八窗玲瓏而人之善惡
莫得以逃之乎不然則其姑示之以天壤使人得以相
之故丹霞道場能就今日耶吾皆不得而知之也因其
就行姑為之序

太平興國堂頭璨公語錄

佛菩薩語流布人間凡五千四十八卷而一祖西來直

指心源不立文字若佛若祖孰少孰多曰教曰禪若此殊軌殊不知佛菩薩語雖累億萬亦未嘗輒立文字而達摩直指心源雖默無一語而五千四十八卷已在其
中矣太平堂頭璨公頃從蔣山何嘗得免昔住太平本
自亡雖據師子座作師子吼未嘗為人世說毫釐法四
方學者皆腦門點地拾其殘膏而襲藏之旦扣枰櫬居
士鄧某湖南之鴻儒以序冠焉居士曰嘻此特其土苴
耳豈其真哉雖然土苴之外何者為真一視而空頭頭

皆是有語亦可無語亦可雷聲淵默本自同時孰為五
千四十八卷而孰為不立文字者乎在佛為弟子在祖
為嫡孫蓋道一也門人弟子若因此以有悟則聲歎動
息皆西來意而況所揚之般若乎若守此以求師則拈
花微笑已是剩法而況所論之葛藤乎悟之者天地一
指守之者毫釐千里反以問師了無語焉余姑為門人
者序之耳師名了璨得法於蔣山勲其祖蓋出於楊岐
之下作字吟詩皆得遊戲三昧而未嘗作意也大丞相

李公嘗訪師於栖雲悅之許為具眼人遂結看經社世人因以多師嗚呼師豈止具眼看經而已耶當有辨之者



栴檀集卷十五